

visius Lauretanus, Petrus Zenus, Marinus Molinus, Paulus Lauretanus, Laurentius Maurus, Nicolaus Contarenius, & Antonius Condulmarius. Quatuor quoque præter illas Belgarum Ducis nomine triremes per eos dies instructæ, quæ & ipsæ patricios ex Veneria, Contarena, Lauretana, & Georgia familia præfectos habuere. Totius classis imperium (tam enim Gallicæ illæ, quam Eugeniæ in Turcos moturæ erant) Alovísio Lauretano est datum: qui cum Condulmario Antislite, omnibus prosperam navigationem prosperumque successum precantibus, domo profecti in altum abiere. Peropportune Christiana classis in Hellespontum venit. Forte acciderat, ut Amurathus Othomanus, Turcorum Rex, per eos dies ex Europa, filio ad Salonicem relicto, ipse (ut dicitur) Genuensium opera in Asiam transfretasset, quo trepidissimis revocabatur nunciis. Constans fama erat, Caramanum Regem ingentibus in eum copiis movisse. Tum vero Asiæ rebus compositis, quum in Europam transire tentasset, comperit Hellespontii angustias a Pontificia classe infestas attentissime custodiri: feceratque ea res spem maximam, fore ut immanissimus hostis a suis exclusus aliquam ingentem in Europa cladem per absentiam adiret. Percrebruerant ad id rumores, Ladislaum Polonum, tripartito copiis Danubio trajectis, ferociter in Turcos qui in Europa erant, movisse. Tenuit aliquandiu ea expectatio: demum sub exitum autumnii cognitum est, trecenta Christianorum millia cum vi Turcorum incredibili conflixisse: pugnatumque a prima diei hora ad vesperam: fortunaque neutro inclinante, utrinque datum fuisse signum receptui: duodequadragenta Turcorum millia eo prælio cæsa: Christianorum decem: in quibus proditum est memoriæ, Gallum hominem inter suos populares illustrem, corpore & animo prævalidum, cum trecentis equitibus per confertissimas hostium catervas ad Othomani præsentiam (qui jam ex Asia ad suos trajecerat) pervenisse: in eumque fortiter inventum, conto prius, inde gladio graviter percussisse. Et quia aureo erat paludamento ornatus, creditus vulgo est

Ladi-